

# Liloba na Nzambe eyei epai na mosakoli William Marrion Branham

## **“Yesu Klisto azali Nzambe”**

*Tala emoniseli : Yesu Klisto azali Nzambe.* Yawe na Kondimana na Kala azali Yesu na oyo ya Sika. Okoki komeka ndenge nyonso olingi, okoki kotalisa te ete ba-Nzambe bazali MISATO. Kasi esengeli pe na emoniseli na nzela ya Molimo Mosantu mpo ososola ete Azali se Moko. Esengeli na emoniseli mpo na komona ete Yawe na Kondimana na Kala azali Yesu na oyo ya Sika. Satana amikotisaki na mayele mabe na kati na lingomba pe abomi bato miso likolo na solo oyo. Pe ntango babomamaki miso na ntina na yango, esengelaki lisusu kougoma ntango molai te mpo ete Lingomba ya Roma etika kobatisa na Nkombo na Nkolo Yesu Klisto.

Nandimi ete mpo na komona bosolo na ntina na Bonzambe esengeli na emoniseli oyo ya solo ya Molimo Mosantu na mikolo oyo epai wapi ebele na Makomi mosantu ebongolami mpo na kokosa. Kasi lingomba oyo esengeli kolonga, molongi, etongami likolo na emoniseli na bongo tosengeli kotalela Nzambe mpo ete Amonisa biso solo na Ye. Nzoka nde, osengeli mpenza na emoniseli te na ntina na libatizi na mai. Ezali wana polele liboso na yo. Ekoki kosalema ata mbala moko ete bantoma babongola motindo oyo eutaki mbala moko epai na Nkolo ya kobatisa na Nkombo na Tata, na Mwana pe na Molimo Mosantu, pe bazanga botosi na nko? Bayebaki malamuni Nkombo yango, pe esika ata moko te ezali kati na Makomi epai wapi babatisaka na lolenge mosusu soko bobele na Nkombo na Nkolo Yesu Klisto. Mayele na yo moko ekolobela yo ete Buku ya Misala ezali nde lingomba kati na mosala, pe soki babatisaka na lolenge oyo wana, ezali bongo nde esengeli kobatisa. Pe soki omoni ete yango ezali makasi mingi, okoloba nini mpo na oyo? Moto soko nani oyo abatisamaki na Nkombo na Nkolo Yesu te asengelaki kobatisama lisusu.

Misala 19.1-6: “Naino ezalaki Apolo na Kolinti, Polo alekaki na nzela na ngomba na kati na mokili, pe akomi na Efese. Azwi bayekoli mosusu wana, pe alobi na bango ete, Wana endimaki bino, bozwi Molimo Mosantu? Balobi na ye ete, Kasi toyoki te soki Molimo Mosantu azali. Ye alobi ete, Na bongo bozui libatisi nini? Balobi ete, Libatisi na Yoane. Polo alobi ete, Yoane abatisi libatisi na kobongwa na motena, pe alobi na bato ete bandimela oyo alingaki koya na nsima na ye, ye wana Yesu Klisto. Eyoki bango bongo, babatisami na Nkombo na Nkolo Yesu. Esili Polo kotiela bango maboko, Molimo Mosantu ayei na likolo na bango, pe basololi na minoko mosusu pe basakoli”. Yango wana. Bato malamumu oyo na Efese bayokaki nsango na Masiya oyo asengelaki koya. Ye nde Yoane ateyaki. Babatisamaki mpo na kobongola mitema na masumu na bango, bazalaki kozila ete bandimela Yesu na MIKOLO OYO EZALAKI KOYA. Kasi sikawa ntango ekokaki mpo na kotala NA NSIMA epai na Yesu pe kobatisama mpo na NDIMBISA ya masumu. Ntango ekokaki mpo na kozwa Molimo Mosantu. Pe ntango babatisamaki na Nkombo na Nkolo Yesu Klisto, Polo atielaki bango maboko pe Molimo Mosantu ayaki likolo na bango.

Oo, bato ya mpiko ya Efese bazalaki bato malamumu mingi; soki moto moko akokaki komiyoka kati na kobatelama, ezalaki nde bango. Tala kino epai wapi bakomaki. Bakomaki kino kondimela Masiya oyo asengelaki koya. Bazalaki pene mpo na koyamba Ye. Kasi ozali komona te ete atako bongo bazangaki Ye? Ayaki pe Azongaki. Bazalaki na mposa ete babatisama na Nkombo na Nkolo Yesu Klisto. Bazalaki na mposa ete batondisama na Molimo Mosantu.

Soki obatisamaki na Nkombo na Nkolo Yesu Klisto, Nzambe akotondisa yo na Molimo na Ye. Yango nde Liloba. Misala 19.6 oyo touti kotanga ezali kokokisama na Misala 2.38: “Bobongola mitema, pe bobatisama *moko moko* na Nkombo na Yesu Klisto mpo na kolimbisama na masumu na bino, pe bokozwa likabo na Molimo Mosantu”. Omoni, Polo, na nzela na Molimo Mosantu, alobaki bobele ndenge moko na oyo Petelo alobaka na nzela na Molimo Mosantu. Pe oyo elobamaki EKOKI TE

kobongolama. Esengeli kozala bobele bongo kobanda na Pentekote kino ntango oyo moponami na suka mpenza akobatisama. Bagalatia 1.8 : “Nde soko biso, soko mwanje na likolo, akosakwela bino Nsango ekeseni na oyo esakwelaki biso bino, tika ete alakelama mabe”.

Nzoka nde bamosusu kati na bino Ba-unitaire bozali kobatisa na lolenge ya mabe. Bozali kobatisa mpo na mbotama ya sika lokola nde kozindisama na mai ekobikisa bino. Mbotama ya sika eutaka na mai te; ezali nde mosala ya Molimo. Moto oyo na nzela na Molimo Mosantu apesaki motindo : “Bobongola mitema, pe moko moko na bino abatisama na Nkombo na Nkolo Yesu”, alobaki te ete mai epesaka mbotama ya sika. Alobaki ete ezali nde “litatoli na lisosoli malamumu epai na Nzambe.” Esili. I Petelo 3.21 : “Mai yango ezali elembo na libatisi likobikisa biso (mpo na kolongola mbindo na nzoto te kasi mpo na kotunaka epai na Nzambe na lisosoli malamumu), mpo na lisekwa na Yesu Klisto”. Nandimi yango.

Soki moto moko azali na makanisi mabe ete lisituale ekoki kotalisa ete libatisi na mai esalemaki ndenge mosusu kokesene na Nkombo na Nkolo Yesu Klisto, nakopesa yo toli ete oyekola lisituale pe omona yo moko. Oyo ezali kolanda ezali lisolo ya solo ya libatisi oyo esalemaki na Roma na mobu 100 nsima na Yesu pe ekomamaki na zolonale TIME, ya mwa 5 sanza ya zomi na mibale 1955. “Mosungi atombolaki loboko, pe Publius Decius akotaki na ekuke ya ebatiselo. Marcus Vasca, moteki mabaya, atelemaki kati na eziba, mai kino na loketo. Azalaki komungamunga wana Publius azalaki kopusana pene na ye na mai ya eziba. Atunaki ye : ‘Credis?’ Publius ayanolaki : ‘Credo’. ‘Nandimi ete lobiko na ngai euti na Yesu Klisto, Oyo abakamaki na ekulusu na ntango na Ponsio Pilato. Nakufi na Ye mpo ete na Ye nakoka kozua Bomoi ya Seko’. Na bongo ayokaki ete maboko ya mbinga esimbaki ye ntango azalaki komikweisa na mokongo na kati na mai ya eziba, pe ayokaki pene na litoyi na ye mongongo ya Marcus — ‘Nazali kobatisa yo na Nkombo na Nkolo Yesu’ — wana azalaki kozinda na mai ya mpio”.

Na ntango wana kino ntango bosolo elimwaki (pe ezongaki te liboso na eleko oyo ya suka — elingi koloba

banda na Nicée kino na ekeke oyo) bazalaki kobatisa na Nkombo na Nkolo Yesu Klisto. Pe ezongi. Satana akoki kopekisa emoniseli te ntango Molimo alingi kopesa yango.

Iyo, soki ba-Nzambe bazalaki misato, mbele bokokaki kobatisa na bolamu mpenza mpo na Tata, pe mpo na Mwana, pe mpo na Molimo Mosantu. Kasi EMONISELI OYO EPESAMAKI NA YOANE, ezalaki ete NZAMBE azali SE MOKO pe Nkombo na Ye ezali NKOLO YESU KLISTO, pe okobatisa mpo na Nzambe MOKO pe Ye se moko. Nde na ntina wana Petelo na mokolo na Pentekote abatisaki na lolenge oyo asalaki. Asengelaki kozala sembo na emoniseli oyo ezalaki: “Na bongo tika ete libota mobimba na Yisalaele bayeba solo ete Nzambe azalisi Ye NKOLO PE KLISTO, Ye YESU oyo bino bobakisi Ye na ekulusu”. Ye wana: “NKOLO YESU KLISTO”.

Soki Yesu azali “MBALA MOKO” Nkolo pe Klisto, na bongo Ye (Yesu) azali, pe akoki kozala eloko mosusu te bobele “Tata, Mwana pe Molimo Mosantu” kati na Moto SE MOKO oyo amonisami na nzoto. Ezali TE “Nzambe kati na bato misato, bosato bosantu”, kasi NZAMBE SE MOKO, MOTO SE MOKO na bibiangelo misato ya minene, na misala misato oyo ezali komonisa bibiangelo misato oyo. Yoka yango lisusu. Bobele Yesu oyo azali “MBALA MOKO Nkolo pe Klisto”. Nkolo (Tata) pe Klisto (Molimo Mosantu) bazali Yesu, mpamba te Ye (Yesu) azali NYONSO mibale (Nkolo pe Klisto).

Soki yango etalisi biso emoniseli ya solo ya Bonzambe te, eloko mosusu ekosala yango te. Nkolo azali oyo mosusu TE; Klisto pe azali oyo mosusu TE. Yesu oyo azali Nkolo Yesu Klisto – NZAMBE SE MOKO.

Mokolo moko Filipino alobaki na Yesu: “Nkolo, monisa biso Tata pe ekokoka na biso”. Yesu alobaki na ye ete: “Nazali na bino ntango molai boye, nde yo oyebi naino Ngai te? Ye oyo amoni Ngai asili komona Tata. Mpo na nini yo olobi ete, Monisa biso Tata? Ngai na Tata, tozali bobele moto Moko”. Mokolo moko natangaki yango pe mwasi moko alobaki: “Zela moke, M. Branham, yo na mwasi na yo bozali moto moko”.

Nalobaki: “Na lolenge oyo wana te”.

Alobaki: “Olobi?”

Bongo nalobaki na ye : “Ozali komona ngai?”

Alobaki : “Iyo”.

Nalobaki : “Ozali komona mwasi na ngai?”

Alobaki : “Te”.

Nalobaki : “Na bongo bomoko wana ekeseni, mpamba te Alobaki : Soko omoni Ngai, omoni Tata”.

Mosakoli alobi ete na ntango na mpokwa pole ekozala. Na kati na loyembo, ekomami :

Na ntango na mpokwa, Pole ekozala,  
Nzela ya Nkembo, okomona yango  
solo;

Pole na lelo ezali na nzela ya mai,  
Ekundami yo na Nkombo kitoko na  
Yesu.

Bilenge pe bakolo, bobongola  
mitema na masumu na bino  
nyonso,

Molimo Mosantu akokota solo kati na  
bino.

Pole na mpokwa eyei,  
Ezali solo ete Nzambe na Klisto  
bazali moto moko.

Eleki ntango molai te nazalaki kosolola na labi moko Moyuda. Alobaki na ngai : “Bino bato na Mabota bokoki kokata Nzambe na biteni misato te pe bopesa Ye na Moyuda. Tokoki kokosama te”.

Nalobaki na ye : “Yango mpenza, labi, tokataka Nzambe na biteni misato te. Yo ondimaka basakoli, boye te?”

Alobaki : “Solo mpenza nandimaka yango”.

“Ozali kondima Yisaya 9.6?”

“Iyo”.

“Mosakoli azalaki koloba mpo na nani?”

“Mpo na Masiya”.

Nalobaki : “Boyokani nini ekozala kati na Masiya na Nzambe?”

Alobaki : “Akozala Nzambe”.

Nalobaki : “Ezali solo”. Amen.

Okoki te kokabola Nzambe na bato misato to na biteni misato. Okoki te kolobela Moyuda ete Tata moko azali,

Mwana moko, pe Molimo Mosantu moko. Akoyebisa yo mbala moko epai wapi likanisi yango euti. Bayuda bayebi ete endimeli oyo ebandaki na likita ya Nicée. Ezali likambo ya kokamwa te ezali bango koseka biso ete tozali bapagano.

Tozali koloba na ntina na Nzambe oyo abongwanaka te. Bayuda bandimaka pe bongo. Kasi lingomba ebongoli Nzambe oyo abongwanaka te longwa na MOKO kino na MISATO. Nzoka nde pole ekozonga na ntango na mpokwa. *Boni ezali kokamwisa komona ete solo oyo ezongi na ntango oyo Bayuda bazali kozonga na Palestina. Nzambe na Klisto bazali MOTO MOKO. Yesu oyo azali MBALA MOKO NKOLO PE KLISTO.*

Yoane azalaki na emoniseli, pe YESU azalaki Emoniseli, pe Amitalisi Ye moko awa na Likomi — “NAZALI Oyo Azalaki, Oyo Azali pe Akoya, Oyo-na-Nguya-nyonso. Amen”.

Soki emoniseli eleki yo moto, tombola miso pe luka Nzambe mpo ozua yango. Yango nde nzela bobele moko mpo ozua yango. Emoniseli esengeli kouta na Nzambe. Eyaka soko moke te na makoki ya bomoto, ya kobotama, kasi na nzela na kolatisama na Molimo. Okoki koyeba Makomi na moto, pe atako yango ezali malamumu mingi, ekoki te. Esengeli kozala emoniseli kouta na Nzambe. Elobami kati na Liloba ete moto moko te akoki koloba ete Yesu azali Klisto soki na nzela na Molimo Mosantu te. Osengeli kozwa Molimo Mosantu pe na nsima, pe bobele na nsima, Molimo akoki kopesa yo emoniseli ete Yesu azali Klisto : Nzambe, Mopakolami.

(Ekamatami na kati ya Botalisami  
ya Bileko Nsambo ya Lingomba.)

Esalemi na lingala na mobu 2004.

LINGALA

©2004 VGR, ALL RIGHTS RESERVED

VOICE OF GOD RECORDINGS

P.O. BOX 950, Jeffersonville, Indiana 47131 U.S.A.

[www.branham.org](http://www.branham.org)

## Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiamana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, koméla:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)